

La'o Hamutuk

Institutu Timor-Leste ba Monitor no Analiza Dezenvolvimentu
Rua Felicidade (Rua Cardoso Dias) Gricenfor, Bairro Central, Dili, Timor-Leste
P.O. Box 340, Dili, Timor-Leste Tel: +670-3321040 ka +670-77234330 (mobile)
Email: laohamutuk@gmail.com Website: www.laohamutuk.org



Dili, 25 Marsu 2026

Submisaun ba Komisaun Especializada Permanente D

no Deputadu sira Parlamentu Nasionál

kona-ba

Projetu Lei n.º 12/VI (3.ª)

atu extinge Conselho Consultivo do Fundo Petrolífero

Introdusaun

La'o Hamutuk hato'o obrigadu barak ba Komisaun D Parlamentu Nasionál ba oportunidade atu partisipa iha audiéncia pública kona-ba Projetu Lei n.º 12/VI (3.ª), ne'ebé propoin atu extinge Conselho Consultivo do Fundo Petrolífero (CCFP). Ami valoriza tebes espasu ida ne'e hanesan oportunidade importante atu kontribui iha forma konstrutiva, nudár sosiedade sivil ne'ebé atua ho baze iha informasaun ne'ebé verifikadu, dadus no evidénsia.

Husi perspetiva sosiedade sivil, ami subliña katak desizaun ida ne'ebé Parlamentu Nasionál sei foti iha projetu lei ida ne'e la'ós de'it kona-ba reorganizaun administrativa iha CCFP, maibé nudár desizaun estratéjiku ne'ebé afeta diretamente ba iha estrutura balansu poder iha jestaun Fundu Petrolíferu — rekursu soberanu ne'ebé determina diresaun ekonomia nasional no sustentabilidade ba jersaun sira tuir mai. Maske ami aseita katak CCFP iha frakeza sira atu haforsa interese públiku tuir filozofia husi lei, ida ne'e, bele hadi'a husi reforma institusionál ne'ebé efetivu liu.

Tanba ida ne'e, La'o Hamutuk konsidera katak *Exposição de Motivos* husi projetu lei ne'e iha duni razau ba inefetividade real – ida ne'e bele hadi'a liu husi reforma ne'ebé apropriadu atu la husik presedente ida ne'ebé bele loke no taka instituisaun estadu ida tuir vontade polítiku de'it.

Maske rekomendasaun sira husi CCFP dala barak la halo publikasaun ne'e la hetan resposta efetiva husi Parlamentu Nasionál no Governu, situasaun ida ne'e la bele interpreta hanesan sinal katak instituisaun ne'e la iha utilidade. Iha kontestu ida ne'e, rekomendasaun sira nafatin iha relevánsia tanba continua relete objetivu fundamentál husi Fundu Petrolíferu no kontribui atu promove balansu informasaun ba públiku kona-ba asuntu ekonómiku, jestaun Fundu Petrolíferu no Orsamentu Jeral Estadu kada tinan.

Falta konsiderasaun institusionál ba rekomendasaun sira reflète limitasaun iha resposta sistema, la'ós prova ba falta utilidade CCFP. Tanba laiha evidénsia ne'ebé klaru no suficiente atu suporta mudansa estruturál, desizaun ida ne'ebé altera balansu podér iha jestaun Fundu Petrolíferu tenke konsidera ho prudénsia no atensaun másima.

Iha perspetiva ida ne'e, La'ó Hamutuk observa katak problema sira ne'ebé identifikadu iha fundamentu ba frakeza iha jestaun no funsionamentu institusionál, ne'ebé bele hetan hadi'a liu husi reforma institusionál. Problema sira ne'e la bele uza hanesan justifikasaun atu elimina CCFP. Ami mós haree frakeza boot ida iha CCFP mak eis titular sira ne'ebé lei prevee sira nian envolvimentu, infelizmente sira la partisipa iha servisu CCFP nian.

Tanba ida ne'e, La'ó Hamutuk hato'o preokupasaun katak eliminaun CCFP, la ho garantia klaru ba mekanizmu substituisaun ne'ebé independente no forte, bele aumenta konsentrasaun podér, hamenus espasu ba análise independente no kria vulnerabilidade ba influénsia polítika iha jestaun Fundu Petrolíferu.

Kontextu fundamentál no relevánsia ba interesse públiku

Fundu Petrolíferu nudár patrimóniu soberanu ne'ebé iha importánsia estratéjika boot ba povu Timor-Leste, tanba nian mai husi rekursu naturál ne'ebé la-renovavel no destinu atu sustenta moris di'ak jersaun atuál no jersaun sira tuir mai – Infelizmente, realidade seidak la'ó iha direasaun ba atinje objetivu prinsipál ida ne'e. Fundu ida ne'e representa oportunidade únika atu transforma rikeza naturál ba benefísiu ekonómiku no sosiál ne'ebé sustentável iha longu prazu, husi enkuadramentu legal, Lei Fundu Petrolíferu determina katak jestaun rekursu ne'e tenke uza ho prudénsia fiskál, klaridade, transparénsia efetiva no iha mekanizmu akontabilidade ne'ebé forte atu garante utilizaun rekursu iha benefísiu interesse nasional.

Iha kontestu ida ne'e Fundu Petrolíferu sai fonte prinsipál ba reseita Estadu no iha papél sentrá iha sustentabilidade fiskál, jestaun ka levantamentu ne'ebé la prudente bele hamosu risku boot ba estabilidade ekonomia no moris di'ak povu nian. Tanba ida ne'e, jestaun ba Fundu Petrolíferu dezeña atu envolve parte interesada sira oin-oin no koko garante balansu podér liu husi sistema "checks and balances", atu evita konsentrasaun desizaun iha entidade ida de'it no promove transparénsia efetiva.

Husi perspetiva sociedade sivil, jestaun Fundu Petrolíferu la'ós de'it responsabilidade Governu atuál, maibé mós tenke envolve Parlamentu Nasional, instituisaun independente no públiku jerál, hodi asegura partisipasaun demokrátika no akontabilidade. Nune'e, prezensa mekanizmu konsellu no análise independente mak fundamental atu prevene risku, hamenus diferença iha asesu ba informasaun no garante katak desizaun sira halo ho baze iha evidénsia no orienta ba interesse públiku.

Tanba ida ne'e, kualkér mudansa iha estrutura jestaun ba Fundu Petrolíferu presiza konsidera ho prudénsia no responsabilidade másima, atu asegura katak transparénsia, akontabilidade no balansu podér nafatin protejidu iha jestaun rekursu soberanu ne'ebé importante liu ba futuru Nasaun.

Boa Governasaun no Akontabilidade iha CCFP

Maske iha espozisaun motivu husi projetu ida ne'e la refere ba Relatóriu Auditoria n.º 3/2024 husi Câmara de Contas (Tribunal de Recurso), konteúdu relatóriu indika ezisténsia limitasaun iha sistema kontrolu internu no jestaun institusionál relasiona ho Conselho Consultivo do Fundo Petrolífero (CCFP) iha Parlamentu Nasional. Relatóriu ne'e refere, prátika despeza iha período 2017–2019 ne'ebé la iha baze legal klaru, inklui atribuisaun donativu, *cabazes Natal* no gratifikasaun, ne'ebé konsidera hanesan pagamentu la apropriadu no ilegál. Ida ne'e, bele konsidera hanesan

“mentalidade entitlement” iha instituisaun Estadu sira ga iha sosiedade kona-ba ezije atu hetan barak liu kompara ho kontribuisaun.

Situasaun ida ne'e refleto frakeza iha prosedimentu administrativu, jestaun despeza no mekanizmu monitorizasaun no supervizaun, ne'ebé iha implikasaun direta ba transparénsia no akontabilidade iha utilizasaun rekursu públiku. Tanba ida ne'e, relatóriu auditoria subliña nesiedade atu hametin sistema jestaun, reforsa kontrolu internu no asegura resposta institusionál ne'ebé efetiva liu no responsavel.

Relatóriu auditoria tenke interpreta hanesan instrumentu fundamental atu identifika frakeza no orienta melloramentu sistema. Nune'e, importante atu halo distinsaun klaru entre rezultadu auditoria no medida polítika ne'ebé apropriada atu responde ba rezultadu ida ne'e.

Rezultadu auditoria la bele uza hanesan justifikasaun direta atu elimina CCFP. Iha kontestu ida ne'e, interpretasaun ne'ebé prudente no proporsional hatudu katak bainhira frakeza identifika, resposta ne'ebé apropriadu liu mak reforma no hametin sistema.

Projetu lei reafirma transparénsia hanesan prinsipiu fundamentál iha jestaun Fundu Petrolíferu. Maibé, iha tempu hanesan, propoin atu elimina KKFP nudár instituisaun konsellu no halo supervizaun ne'ebé importante atu garante independénsia iha análise no monitorizasaun. Transparénsia la'ós de'it kona-ba disponibilidade informasaun maibé depende iha kapasidade atu halo verifikasaun, análise no supervizaun ne'ebé livre husi interferénsia. Ami nota katak CCFP rasik la pratika transparénsia maibé ida ne'e bele hadi'a no mellora liu reforma ne'ebé apropriadu liu.

La'ó Hamutuk rekomenda:

La'ó Hamutuk konsidera katak resposta ne'ebé apropriada liu ba situasaun atuál KKFP nian la'ós halo eliminasaun ka taka instituisaun, maibé hametin liu tan sistema jestaun institusionál ne'ebé bele haforsa partisipasaun, transparénsia, akontabilidade no balansu poder iha jestaun rekursu públiku.

Tanba ida ne'e, ami rekomenda atu realiza avaliaun independente, promove reforma institusionál no legál no asegura implementasaun regra hodi aumenta resposta institusionál. Paralelamente, prezisa hametin transparénsia efetiva, kontrolu rigorozu ba despeza no espasu partisipasaun públiku atu garante análise kritika ne'ebé bazeia ba informasaun ne'ebé klaru no proteje interese públiku. Ami mós sujere atu hasai regra sira ne'ebé prevene publikasaun sira husi paresér CCFP nian.

Se prezisa halo ajustamentu estrutural, mekanizmu substituisaun tenke garante independénsia, mandatu klaru no kapasidade atu dezempeña funsaun supervizaun ho efetividade.

Ho Respeitu:



Marta da Silva



Celestino Gusmão



Charles Scheiner



Mariano Ferreira



Jonathan Gonsalves



Elia da Costa Araujo



Elivania Alves Correia